



Nakon hapšenja i pretresa u akciji Brod **Određen pritvor Senadu Sakiću**

Sakić uhapšen u Sarajevu, isti dan kada je u Srbiji privedeno devet osoba koje se sumnjiče za šverc droge iz Turske

Sud BiH prihvatio je prijedlog Tužilaštva BiH te odredio pritvor Senadu Sakiću (1985), rođenom u Tuzli, nastanjenom u Živinica-ma, a koji se sumnjiči za organizovani kriminal, odnosno šverc heroina i spida iz Turske u našu zemlju.

Sakiću je pritvor, kako nam je potvrđeno iz ove pravosudne institucije, određen u ponedjeljak zbog opasnosti od bjekstva, uticaja na svjedoke i saučesnike, te ponavljanja krivičnog djela.

Senad Sakić, zvani Senči, uhapšen je u petak u akciji kodnog imena Brod, te dan kasnije predat Tužilaštvu BiH, potvrđeno je

jučer iz SIPA, odakle su istakli da je on priveden u Sarajevu, gdje je pretresen stambeni objekat koji koristi, te nađeni i oduzeti oko 300 grama spida, dvije precizne vage, mobilni telefoni, određena suma novca, SIM kartice i drugi predmeti koji mogu poslužiti kao dokaz u daljem postupku.

Isti dan, pretresi su izvršeni i na području Živinica, a u ponedjeljak je u Živinicama pretresena kuća A. S, navodno Senadovog brata, gdje su nađena 1,3 kg nepoznate praškaste materije, koja je poslana na vještačenje.

Inače, prijavom koju je SIPA dostavila protiv Sakića, obuhvaćene su još četiri osobe koje su uhapšene isti dan u akciji koju je izvela srbijanska policija s ciljem suzbijanja međunarodne trgovine drogom, kada je privedeno ukupno devet državljana BiH, Turske, Hrvatske i Srbije, koji se sumnjiče za pripadnost organizovanoj kriminalnoj grupi.

Akcija u Srbiji je, podsjećamo, provedena u sklopu zajedničkih aktivnosti nadležnih organa Slovenije, BiH i Srbije, a hapšenja su izvedena na području Novog Pazara i Beograda.

L. S.